

20. oktober 2021

UKA2021/95

Naalackersuisut Kommune Qeqertalimmi aamma Avannaata Kommuniani campusimik pilersitsinissaq siunertaralugu suliniutit suut aallartinneqassanersut misissueqqullugit peqquneqarnissaannik Inatsisartut aalajangiiffigisassatut siunnersuut. Misissuinermit ilaatigut qulaajarneqassapput, Aasianni GUX-ip pitsaassusaanut aammalu tiguneqarnissamut toqqammavigisat allannguutaanngitsumik, Ilulissani GUX-imik pilersitsinissamut suliniutit pisariaqartut. Misissuineq juli 2022 naatinngu saqqummiunneqassaaq. (Inatsisartunut ilaasortaq Doris Jakobsen Jensen, Siumut)

Inatsisartunut ilaasortap Siumumeersup Doris Jensenip siunnersuutaannut Siumumiit imaattumik oqaaseqassaagut.

Naalackersuisup akissutaanni aammalu itigartitsinerminnut tunngavilersuutigisaanni oqaasit Inatsisillu ullumikkut malitavut aallaavigalugit Naalackersuisut ilinniartitsineq pilersitsinissamik assinganillu atorunnaarsitsinissamik periarfissaqareersut ersarissaatitut tunngavilersuutigineqarput. Maluginiarparput allannguutissamik siunnersuuteqarsimasinnaagaluarnerit Naalackersuisut atorsimangikkaat, taamaammallu uagut Siumumiit imaattumik allannguutissatut siunnersuuteqassaagut.

Naalackersuisut Avannaata Kommuniani ilinniarnertuunngorniarfimmik pilersitseqqullugit peqquneqarnissaannik inatsisartut aalajangiiffigisassaattut siunnersuut. Ilinniarnertuunngorniarfimmil Silaannaap allanngoriartorneranik ilinniartitsineq, Pinngortitamik atuilluarnermik tunngaveqartumik ilinniartitsineq, piujuaannartitsineq aallaavigalugu nunaqavissunik peqateqarluni ilinniartitsineq, pisuussutinik pigisatsinnik naleqarnerulersitsineq kiisalu kulturitta aningaasarsiutitut inuussutissarsiutaasinnaaneranik ilinniartitsinerit tunngavigineqarlutik ilinniarnertuunngorniarfimmik pilersitsineq aaqqissuunneqassaaq.

Piffissanngorpoq uagut nammitsinnik naleqartitavut pisuussutillu pigisavut aallaavigalugit ilinniartitsineq ineriisaanerit ingerlatissallugit, ulloq aamma nalliuttariaqarpoq nunarput inuulu pillugit oqallinneq nunatsinnit aallaaveqartissallugu. Issittoq nunarsuarmioqatitsinnik annertuumik ukkatarineqarpoq. Nunarsuarmioqativut Naalagaaffiillu pissaanilissuit aamma issittumiinngitsut issittoq pillugu periusissiallit amerlatsikkaluttuinnarput. Nunarsuup issittortaani inuit najugaqartut 4 mio missarluinnaaniippot taakkunangalu uagut 56.000-iulluta. 56.000-iinnannguugaluarluta issittumi qitiusutut inissisimanerput allanut issittumi najugaqartunut sanilliulluta immikkuullarippoq, nunarujussuaq issittup qiterpiaani inissisimasooq uagut kisitta nunagigatsigu.



Taamaammat piffissaalluarpoq inooriaaserput issittumilu najugaqartutut inuussaatsitta ilinniarsimassutsikkut tunngavissinneqarsimasumik ilusilersussallugu.

Kulturitoqqatsinniippoq pinngortitamik atuilluarneq, piujuaannartitsinermik paasinnittaaserput nunarsuup sinnerata paasinnissimanerannit allaaneruvoq, silaannaap allanngoriartornera issittumi sermip aakkiartorneranit uuttortarneqarpoq, allanit allaanerusumik inuusaaseqarpugut siulitsinnit maani nunami inuuginnarsinnaanerput tunngavissinneqarsimalluni. Issittumi inuusut oqariartuutaat nunarsuup sinneranit tusaaniarneqarput annertuumik, tamakku itinerujussuarmik eqqartorneqassasut Siumup kissaatigilluinnarpaa, taamaammallu allannguutissatut siunnersuut saqqummiupparput neriulluta taperserneqarumaarluta. Siulitta nunami maani inuuginnarnissatsinnik qularnaarinnissimanerat uagut kinguaassatsinnut ingerlateqqissagutsigu ilinniartitaanikkut immitsinnut aallaavigaluta inerisaanissaq tullinnguuppoq. Taamak oqaaseqarluta allannguutissatut siunnersuut ataatsimiitsitaliami suliarineqassasoq kissaatigaarput.

Vivian Motzfeldt, Siumut